

主編 張羽新 趙曙青
副主編 張雙志

清朝治理新疆方略彙編

附錄

學苑出版社

一、清朝统一新疆过程中对待维吾尔族宗教的基本政策

(一)

順治二年十二月丙午

更定朝儀：每元旦慶賀，皇上先御武英殿，內大臣、兩旗護軍統領、護軍參領……行禮畢，皇上御太和殿，眾官跪迎。乃升座，諸王、貝勒、貝子等奉表於階上，行禮；次兩翼滿洲、蒙古、漢軍各官；次漢文武百官；次朝鮮進貢使臣；次外國諸王使臣；次吐魯番回回、哈密衛人及董蘇固爾地方喇嘛等。

(《清世祖實錄》卷二二)

康熙三十六年八月己酉

哈密額貝杜拉·達爾漢白克疏言：臣既擒塞卜騰巴爾珠爾並噶爾丹屬下諸人，厄魯特必不悅臣，而哈密又素弱，用是危懼，伏乞庇而安之。且臣所畏者，策妄阿喇布坦也。祈皇上升敕使勿害臣，給臣敕印，俾有恃以無恐，以保我疆土。且使葉爾欽、吐魯番等聞之，必共欣羨，各思向往。更懇移回子屯於肅州，凡朝覲往來俱自肅州乘驛，使臣地聲息得時至聖上之前。下議政大臣等議。尋議覆：額貝杜拉誠

心向化，擒噶爾丹之子及屬下人來獻，殊為可嘉，應議叙以示鼓勵。額貝杜拉授為一等部長，伊子郭帕白克、白奇白克授二等部長，分編旗隊，並令伊子郭帕白克率一百人駐扎肅州。應給額貝杜拉管轄哈密國印，遣理藩院郎中布爾賽奔疆前往分遍旗隊。又請給纛及請安進貢使人俱自肅州乘驛，應如所請。得旨：依議。纛用紅。有應報聞之事，準十五人乘驛。

(《清聖祖實錄》卷一八五)

康熙三十七年正月庚寅

策妄阿喇布坦遣彭蘇克喇木扎木巴、多爾濟察桑等進貢，並疏言：第巴將達賴喇嘛圓寂之事匿而不宣，斥正傳之聖徒班禪，自尊其身，有玷道法，詐稱達賴喇嘛之言以混亂七旗喀爾喀。……上諭之曰：休息兵戎，令宇內升平，始云道法。若以護法為辭，必生弊端。如爾等雖招撫回子，曾滅其教，亦能令其皈依佛法，跪拜喇嘛否？今天下太平之時，唯令各行其道，若強之使合，斷不可行。……

(《清聖祖實錄》卷一八七)

雍正五年二月丙寅

封哈密扎薩克達爾漢白克額敏為鎮國公，賞銀一千兩，其下種地回民四百人各賞銀兩布匹。以口外開墾著有成效也。

(《清世宗實錄》卷五三)

雍正七年四月辛巳

諭內閣：直省各處皆有回民居住，由來已久。其人既為國家之編氓，即俱為國家之赤子，原不容以異視也。數年來屢有人具摺密奏「回民自為一教，異言異服，且強悍刁頑，肆為不法，請嚴加懲治約束」等語，朕思回民之有教，乃其先代留遺，家風土俗，亦猶中國人之籍貫不同，嗜好方言亦遂各異。是以回民有禮拜寺之名，有衣服文字之別，要亦從俗從宜各安其習，初非作奸犯科、惑世誣民者比，則回民之有教無庸置疑也。唯是凡人生產雖不同地，而同具此天良；習尚雖不同教，而同歸於為善。回民處天地覆載之內，受國家養育之恩，可不孜孜好善，共勉為醇良乎？且朝廷一視同仁，回民中拜官受爵、薦登顯秩者嘗不乏人，則其勉修善行守法奉公以為良民者，亦回民之本心也。要在地方官吏不以回民異視，而以治衆者治回民；為回民者亦不以回民自異，即以習回教者習善教。則賞善罰惡，上之令自無不行，悔過遷善，下之俗自無不厚也。如陝省之回民較他省尤多，其販私聚賭私藏兵器，種種不法之案屢出，較他省回民為甚；又如奉旨禁宰牛只，乃勸民務農勤稼，所以重惜力耕之物命，聞回民頗有怨言，且有私自屠宰者。此即居心殘忍，不務本奉法之一端也。朕念萬物一體之義，豈忍視回民與衆民有殊？特詳加訓誨。回民者當知率由禮義，講讓興仁，毋恃強而凌弱，毋倚智而欺愚。倘自謂別為一教，怙惡行私，則是冥頑無知，甘為異類。憲典俱在，朕豈能寬假乎！自茲以後，父戒兄勉，姻婭族黨互相箴規，盡洗前愆，束身向善，以承天地覆載之恩，以受國家教養之澤，豈不美歟？直省各督撫等務宣布朕意，咸使聞知。

（《清世宗實錄》卷八〇）

雍正七年十二月辛丑

晉封哈密鎮國公額敏為固山貝子。

（《清世宗實錄》卷八九）

雍正八年五月甲戌

署安徽按察使魯國華條奏：回民居住內地，不分大小建，不論閏月，以三百六十日為一年，私計謀日為歲首，群相慶賀。平日皆戴白帽，設立禮拜、清正等寺，妄立把齋名目，違制惑衆。應請嚴行禁革，恪守典章，違者照律定擬。如地方官容隱，督撫徇庇，亦一併議處。得旨：回民之在中國，其來已久，伊既為國家編氓，即皆為國家赤子也。朕臨御天下，一視同仁，豈忍令回民獨處德化之外？是以曾頒諭旨，訓以興孝勤忠，望其型仁講讓，服教慕義，共為善良。即數年來亦未見回民作奸犯科，逞凶肆惡者。且其中有志上進者甚多，應試服官同於庶士，而以文武科名出身游登顯秩、為國家宣力效忠者常不乏人。至回民之自為一教，乃其先代相沿之土俗，亦猶中國之大，五方風氣不齊，習尚因之各異，其來已久矣。歷觀前代，亦未通行禁約，強其畫一也。魯國華此奏甚屬苛刻怪誕。回民何嘗不遵正朔，而只以其私記時日，即加以不遵正朔之名？回民何嘗不遵服制，而只以其便用冠巾，即加以不遵服制之罪？至於禮拜、清正等寺名，亦不過如各省村邑崇奉其土俗之神，皆為祀典之所不載，何獨於回民刻意吹求，指為罪案乎？若回民果有干犯法紀之處，國憲俱在，自當按律懲治，並無曲宥回民之條。向後，倘回民本無過愆，而大小官員等但因其習尚稍有不同，以此區區末節故意刻求，妄行瀆奏，朕必嚴加處分。魯國華此奏非有挾私報復之心，即欲惑亂國政。著將魯國華交部嚴加議

處。

(《清世宗實錄》卷九四)

雍正十年十一月乙未

諭吐魯番頭目額敏和卓等：吐魯番部落遠在邊境之外，去巴爾庫爾軍營尚有七八百里，易為賊人之所窺伺，我師難於庇護。朕以仁愛為心，是以聽其自便，不强其歸順我朝，致受賊人之侵擾也。乃前歲岳種琪並未奏聞，直以己意遣官帶領駝只前往采買米石，致啟賊人侵擾。而額敏和卓與回眾等誠心歸向我朝，努力奮勇抗拒賊兵。上年賊眾三次圍攻，回眾與官兵並力抵禦，不但全城無恙，且出其不意乘間擊刺，屢挫賊鋒。忠勇之氣，甚屬可嘉。然賊夷狡獪異常，時以侵擾吐魯番為疲敝我師之計。是以副將軍張廣泗等議將爾等搬移近邊之地，以避賊人侵害。前月具奏到日，朕深念爾等移徙之時賊人或於中途窺伺，又恐天氣寒冷，男婦老幼苦於行役，屢降諭旨令署大將軍等於途次加以防護，到時善為安插，務令人人得所。此數月以來，朕無時不以爾等安土重遷繫於心也。今閱署大將軍查郎阿等奏報「回民大小一萬余口已於十月十四、十七等日陸續起程，群情踴躍，計日可到」，朕心甚為欣慰。因思年來爾等屢遇強寇而未遇其戕害，今安穩遷移，永居樂土，世受我朝恩庇，皆爾等忠誠感格上天顯賜福祐之明證也。除已降旨令署大將軍等悉心部署並優加賞賚外，額敏和卓著封為扎薩克輔國公。其余頭目等有應加恩賞授官職者，俟大將軍查奏到日再降諭旨。著將此通行曉諭回民共知之。

(《清世宗實錄》卷一二五)

御製敕建回人禮拜寺碑記清高宗(乾隆帝)

(增)辦理回人佐領事務處，乾隆二十五年奉旨授白和卓為回子佐領，以投誠回眾編為一佐領，於西長安街路南設回營一所居之，共房百四十有七楹。回營內設辦事房，以內府官董其事。回營之西建禮拜寺，北向。寺門內恭立御製敕建回人禮拜寺碑記。上同。

(增)御製禮拜寺碑文

為天下共主，俾阻遐遜聽，壹稟我約束，而後戎索所屆，風氣莫敢以自私，尚已。顧在昔奇象鞅譯之掌，必與之達志通欲，修其教不易其宜，厥旨豈相戾哉？蓋惟極天下之不齊以致其大齊，而觀化者益臻於無外。考前史，回紇自隋開皇時始入於中國，至唐元和初，偕摩尼進貢，請置寺太原，額曰大雲光明，實為禮拜寺所由昉。然其致之也，或以假師以通市，於納土服屬我毗我隸之義故無當焉。朕寅承天地祖宗鴻庥，平準噶爾，遂定回部各城。其伯克霍集斯、霍什克等並賜爵王公，賜居邸舍。而餘眾之不令回其故地者，咸居之長安門之西，俾服官執役，受廛旅處，都人因號稱回子營。夫齒繁則見龐，類辨則情渙，思所以統同合異，使瞻聽無奇袤，初不在闢其教而揉矯之也。且準部四衛拉特內附，若普寧寺，若固爾札廟，既為次第創構，用是寵綏，回人亦吾人也，若之何望有缺耶！爰命將作支內帑羨金，就所居適中之地，為建斯寺。穹門壇殿，翊廡周阿，具中程度。經始以乾隆癸未清和吉月，浹歲落成。回眾以時會聚其下，輪年入觀之眾伯克等無不歡欣瞻拜。詫西域所未曾覩，問有叨近日之榮，而兼擅土風之美，如是舉者乎！咸鞠脆虞抃曰：然。復重諗之曰：爾回之俗嚮，惟知有魯斯訥墨，今則朔奉朝正矣。嚮惟知有騰格，今則鑄頒泉府矣。越及屯賦觀嚮諸令典，其大者靡弗同我聲教，而國家推以人治人之則，更為之因其教以和其眾。揆諸萬舞備銅繩之上技，九賓綴屢頭之班，

此物此志云爾。其誰曰不宜！乃為之記而系以銘。孰為天方？孰為天堂？花門秘刹，依我雲間。厥城默伽，厥宗墨克。派哈帕爾，傳依鐵勒。經藏三十，咨之阿渾。西向北向，同歸一尊。珉城枌梁，司工所作。會極歸極，萬邦是若。乾隆二十有九年歲在甲申仲夏之吉，御製並書。

（增）回子館學，乾隆二十一年立，在西華門內右翼門外，東向。緬子館，乾隆三十二年立，在西華門內右翼門外造辦處南門外迤東路北。上同

（于敏中等編纂：《欽定日下舊聞考》卷七一）

(二)

乾隆二十年冬十一月庚午朔

上諭軍機大臣曰。厄魯特公納噶查侍衛官長保等。帶領額敏和卓回人及達什達瓦兵丁。前往阿克蘇城。額敏和卓回人甫回自伊犁。達什達瓦兵丁亦從游牧初到。今復派往阿克蘇城。雖非進兵可比。但係遠行。著加恩於應得口糧外。宰桑每員給銀二十兩。兵丁每名給銀十兩。令其寬裕整裝。並著和起曉諭額敏和卓及達什達瓦之妻。務揀選諳諫宰桑。管轄兵丁。妥協前往。

命封額敏和卓爲鎮國公。

上諭軍機大臣曰。前額敏和卓帶領回兵。直抵伊犁。甚屬奮勉。今復派伊所屬兵丁。前赴阿克蘇城。著加恩封額敏和卓爲鎮國公。以示獎勵。

(平定準噶爾方略)卷二十一

乾隆二十一年冬十二月辛巳

命安西提督傅魁領兵應援額敏和卓。

上諭軍機大臣曰。據黃廷桂奏稱額敏和卓遣子素賚滿至哈密請兵救援。伊保護游牧。與賊相拒。靜候大兵前往等語。額敏和卓拒賊固守。甚可嘉。著加恩封授貝子。伊子素賚滿著賞給公品級。以示獎勵。現在傅魁已抵哈密。馬得勝亦陸續領兵至彼。卽著傅魁選兵五百名。帶同素賚滿馳赴額敏和卓游牧應援。務將莽噶里克設法擒拏。倘兵力不足。卽著額敏和卓帶領屬人。同傅魁回至哈密。俟大兵到彼。再行辦理。

(平定準噶爾方略正編)卷三十五

乾隆二十一年冬十二月壬午

申諭安西提督傅魁領兵速進事宜。

上諭軍機大臣曰昨降旨令傅魁帶兵赴援額敏和卓並與額敏和卓密商辦理莽噶里克事宜。今據雅爾哈善奏稱莽噶里克發兵二百名往助額敏和卓等語。又與昨黃廷桂所奏情形不同但素賚滿來時並未言及莽噶里克助兵之事或因伊子白和卓未遣歸巢故有此舉實則首鼠兩端難以遽信。著傳諭傅魁俟見額敏和卓時密與酌量情形如莽噶里克易於擒拏仍遵前旨辦理。卽助兵屬實亦係因救子起見且伊於和起被困時情罪可惡不得少爲寬假。若果有効順之心尙可暫爲羈縻俟大兵至彼再爲辦理。惟聽額敏和卓相機酌定傅魁接到此旨迅速前往毋得遲悞致失機宜。

(平定準噶爾方略正編)卷三十五

乾隆二十二年春正月辛酉

命額敏和卓遣人曉諭霍集占。

上諭軍機大臣曰前降旨令額敏和卓遣人送回霍集占所遣使人沙呢雅斯並令五十六托倫泰同往今莽噶里克已經辦理路徑已通著卽遵照前旨遣往其從前兆惠遣往之副都統阿敏道現在何處著卽曉諭霍集占等遣使送回。

(平定準噶爾方略正編)卷三十六

乾隆二十二年春二月辛卯

駐劄巴里坤辦事大臣雅爾哈善等疏奏額敏和卓派人曉諭波羅泥都等事宜。

雅爾哈善等奏言前令傅魁傳

諭額敏和卓令其派人隨同五十六托倫泰等帶同霍集占使人沙呢雅斯回至葉爾羌喀什噶爾等處並令其寄信曉諭波羅泥都霍集占等令據傅魁報稱額敏和卓已選派回人六名並繕就寄與波羅泥都等書信俟五十六等抵魯克察克即令由吐魯番之南羅卜淖爾一路前往回部中途並無厄魯特等在彼阻滯等語臣等查五十六等此時應已抵魯克察克即照額敏和卓所請令伊等帶同來使即赴回部曉諭奏入報

聞

(平定準噶爾方略正編)卷三十七

乾隆二十二年夏五月庚午

命公素賚璠馳驛來京。

上諭軍機大臣曰吐魯番貝子額敏和卓因加恩封伊貝子及伊子素賚璠公爵奏請遣素賚璠來京謝恩額敏和卓及伊子素賚璠實心報効深可嘉予著照所請即令素賚璠馳驛來京備朕詢問。

(平定準噶爾方略正編)卷四十

乾隆二十二年夏六月己亥

諭吐魯番貝子額敏和卓辦理回部事宜。

上諭額敏和卓曰將軍成衮扎布奏請辦理霍集占及波羅泥都。朕意於明春進兵。已諭知該將軍矣。此二賊前被準噶爾囚繫。朕特加恩。俾仍領舊部。乃負恩黨逆。戕害我副都統阿敏道。其罪必不可。迨然皆二賊狡謀。其脅從回衆。尙屬可有。爾受朕厚恩。且係回部望族。爲衆所信。若能設計誘擒。或使回衆離心。執獻二賊。更可不勞師旅。爾卽酌量辦理。若必需用兵。則用兵若干。應於何時進剿。爾卽據所見密奏。

(平定準噶爾方略正編)卷四十一

乾隆二十二年秋七月辛未

諭吐魯番貝子額敏和卓辦理進兵事宜。

上諭額敏和卓曰。據爾奏稱。請於明年四月進兵。願從軍自効等語。朕已鑒悉。至進兵之期。三四月俱可。又所奏兵數。雖亦計出萬全之意。但以我兵精銳。直抵回城。尙不須多爲調集。爾受恩深重。奮勉可嘉。卽投爲領隊大臣。於爾所屬派兵一百名。在前鋒行走。俱照軍管兵丁一例。賞給此際宜加慎密。不可稍有漏洩。

(平定準噶爾方略正編)卷四十二

乾隆二十二年冬十月辛卯

命加吐魯番貝子額敏和卓貝勒品級。

上諭軍機大臣曰。吐魯番貝子額敏和卓遣人前往哈喇沙爾。採取沙喇斯瑪呼斯信息。即領兵前往托克三守候。後因賊人未至哈喇沙爾。又遣往和爾米斯和喇探聽。相機進剿。似此感激朕恩。誠心効力。甚屬可嘉。著加恩給與貝勒品級。明歲辦理葉爾羌喀什噶爾等處。令爲參贊。昨已降旨。其益加奮勉。以膺恩賞。

(平定準噶爾方略正編)卷四十五

乾隆二十二年冬十二月癸未

命兆惠爲定邊將軍。策布登扎布爲定邊右副將軍。成衮扎布仍爲定邊左副將軍。辦理北路事務。上諭軍機大臣曰。今命兆惠爲定邊將軍。策布登扎布副之。來年辦理進兵。惟兆惠等是賴。可傳諭兆惠當與策布登扎布富德。同心協力。不可自分畛域。至額敏和卓因其熟悉回部情形。人亦果毅。已命爲參贊大臣。在前隊行走。兆惠等務宜優待。以收其益。一切軍前事務。相機辦理。善自策勵。以奏膚功。

(平定準噶爾方略正編)卷四十七

乾隆二十三年春正月庚寅

諭參贊大臣雅爾哈善等傳示阿奇木伯克霍集斯。上諭軍機大臣曰。從前平定伊犁時。達瓦齊敗走回部。爲圖爾璊阿奇木伯克霍集斯等遣阿舒爾瑪特擒送軍營。不知此時圖爾璊地方。尚係伯克霍集斯辦事。抑或更替他人。可傳諭雅爾哈善等於進兵時訪問。若仍係伯克霍集斯辦事。則卽向伊等云爾等從前將達瓦齊擒獻。係有功之人。皇上卽施恩賞賚。尚欲陸續加恩。因辦理厄魯特等無暇。今厄魯特等俱已平定。領兵前來。專爲問爾和卓木之罪。與爾等無涉。爾等惟誠心效順。自必永承恩澤。仍酌賞銀疋等物。以示獎勵。凡大兵經過地方。皆當如此宣示。及酌量獎賞。俾回人聞風歸嚮。或將逆酋擒送。亦未可定。卽不然。而衆心內附。逆酋等自必力窮無助。我兵擒勦亦易。如歸附人等有奮勉行走者。更宜核實獎賞。雅爾哈善等當加意辦理。

(平定準噶爾方略正編)卷四十八)

乾隆二十三年春正月己酉

諭軍營將軍大臣等。上諭軍機大臣曰。成衮扎布奏稱前年投來軍營之庫車伯克鄂對烏什伯克塞梯巴勒氏噶岱默特等請交與額敏和卓令其招降舊屬。再將軍大臣等前往沙喇壁勒。經過納林特穆爾圖淖爾等處。宜曉示布魯特人等。令將霍集占等擒獻等語。成衮扎布所見。甚合機宜。現在雅爾哈善等辦理回部。著將奏摺錄寄閱看。并傳諭兆惠若舊伯克鄂對等。尚在軍營。卽送至額敏和卓處。令其招降舊部。再布魯特康與回人相善。恐不知辦理緣由。或協助霍集占等。兆惠經過其地。須曉示伊等。以準噶爾俱已平定。伊犁等處。現在駐兵屯田。哈薩克全部歸降。今因霍集占等背叛。與師問罪。恐爾等妄生畏懼。其各安居游牧。若霍集占窮蹙來投。卽行縛送。大皇帝當格外施恩。亦傳諭雅爾哈善知之。

(平定準噶爾方略正編)卷四十九)

乾隆二十三年春二月癸未

諭靖逆將軍雅爾哈善等進剿回部事宜

上諭軍機大臣曰。據雅爾哈善等議奏辦理回部事務。俱協機宜。看來成功尚易。但用兵關係緊要。仍當慎之又慎。於其易者難之。則事成更速。且永得安定矣。今兆惠等進剿沙喇孛勒賊衆。已諭令竣事後。取道夾攻回部。卽剿賊需時。亦必派兵堵截。然雅爾哈善係專辦回部。當與額敏和卓悉心計議。至所奏伯克鄂對等三人。俱係回人頭目。懇請効力軍前。甚屬可嘉。著加恩授伯克鄂對爲散秩大臣。賞伯克色梯巴勒氏伯克噶岱默特三品頂帶。俱著戴孔雀翎。仍傳諭伊等若能招降各城回人。卽照舊令其管轄所屬。仍加恩封賞。又

諭曰。阿里袞等帶往軍前之右衛前鋒索諾木扎卜。曾爲厄魯特喇嘛等遣往回部。熟悉伊地情形。因照額敏和卓所言。繪圖令其訂正。奏呈朕覽。著將此圖發與雅爾哈善等閱看。如進兵時。有應行查

勘者。卽相機辦理。索諾木扎卜仍著爲前鋒。在雅爾哈善隊內奮勉行走。又阿里袞等前至布葉地方。搜獲回人巴雅爾等。據供係庫爾勒伯克托克托之屬人等語。雅爾哈善等進兵至庫爾勒。彼處人等若輸誠歸附。卽諭以仍令伯克托克托管轄。此時且隨軍効力。伊等既有名稱。前至葉爾羌喀什噶爾等處。招降所識人等。自屬有益。其他收服回人頭目。亦可照此辦理。再義州馬甲巴爾泰去年從回部脫出。頗知彼處路徑。亦著在前鋒効力。其從前由準噶爾脫出。安插安西之旗人內。有識回地路徑。願効力者。俱行遣往。果能奮勉將來。仍令伊等來京。歸入本旗。俱著傳諭雅爾哈善等知之。又

諭吐魯番貝勒品級額敏和卓曰。爾同將軍議奏進剿霍集占等情形。看來成事頗易。朕甚嘉悅。昨賜爾貝勒品級。貝勒分內。有應置長史護衛司儀等官員。卽於爾屬人內選補。俾得受朕恩。爾使令亦

可得力。其職銜品級。已據該部開列。卽遵照補授。論定邊將軍兆惠等。協勦回部事宜。

上諭軍機大臣曰。據額敏和卓奏稱。自沙喇壁勒前。往回部。由巴達勒可至喀什噶爾。由穆素爾嶺。可至阿克蘇。兩路俱險僻難行。另有間道。選派熟識數人。前赴兆惠處。可作嚮導等語。額敏和卓所派之人。俱可信用。著傳諭兆惠等。務加意看待。再兆惠前往沙喇壁勒。在魯克察克進兵之先。如勦賊事竣。尚可趨赴。夾攻回部。萬一逾時不及。卽詢額敏和卓所派之人。於應行堵截之路。派兵防守。倘回首窮蹙。竄逸。自可弋獲。又據阿里衮將額敏和卓。向前鋒索諾木扎卜。所繪回部地圖具奏。朕看圖內。有自沙喇壁勒。通喀什噶爾。葉爾羌之路。著發與兆惠等閱看。

(平定準噶爾方略正編卷五十一)

乾隆二十三年二月辛卯

靖逆將軍雅爾哈善等。疏奏招撫回部事宜。

雅爾哈善等奏言。臣等欽遵

聖訓。體察回部情形。相機籌辦。伏思額敏和卓。乃回部素有名望。聞烏什城頭目伯克霍集斯兄弟。子姪分居四城。其勢與兩和卓木相等。亦相聽信。若額敏和卓。擇親信之人。設間於伯克霍集斯。以離其黨。或能擒送逆酋。一面進兵安撫。成功尤速。商之額敏和卓。亦以爲然。現在吐魯番有伯克霍集斯舊屬五六戶。擬選擇數人帶往。俟取庫車後。相機差遣。至圖爾璦與吐魯番同異。詢據額敏和卓云。伯克霍集斯之父阿斯呼。濟原係吐魯番頭目。康熙年間。大兵入吐魯番。我兩兄以魯克察克城歸附。阿斯呼濟。逃入準噶爾。及大兵撤回。策妄阿喇布坦。送回阿斯呼濟。將我兩兄戕害。遷吐魯番魯克察克回衆。於哈喇沙爾。又遷往烏什。故仍稱烏什城爲圖爾璦。卽係吐魯番等語。再現在軍營索倫兵。合計

可得四百五十名。臣等行文兆惠派發索倫兵五百名前來。以符一千名之數。奏入。

上諭軍機大臣曰。據雅爾哈善奏招撫伯克霍集斯等事。頗合機宜。但額敏和卓既爲叅贊大臣。卽應列名同奏。勿存分別之見。至行文兆惠調發索倫兵丁。現在遣送兆惠軍營之綠旗兵一千名。因慮難及師期。已停其前往。是兵丁本屬無多。且兆惠之機宜在勦雅爾哈善。之機宜在撫兩路所用索倫兵。自當權其多寡。亦不必調往雅爾哈善軍營。可傳諭兆惠雅爾哈善等。若所調索倫兵。起程未遠。兆惠仍卽追回。此旨著速行飛遞。

（平定準噶爾方略正編）卷五十一）

乾隆二十三年夏四月己巳

命封額敏和卓爲貝勒。

上諭軍機大臣曰。吐魯番貝勒品級額敏和卓効力軍前。備抒誠悃。朕心嘉悅。著加恩賞封貝勒。仍以叅贊大臣。同將軍等辦理軍務。又

諭曰。現在雅爾哈善額敏和卓進取回部。自可立奏膚功。但擒獲逆酋後。仍另選本處伯克令其辦事。伊等俱係新附。恐一時難知賢否。且伊犁駐兵屯田。關係甚重。亦宜豫爲籌畫。從前伊犁地畝。皆回人耕種。今俟回城平定。卽將回人酌量遷移。與綠旗兵叅雜。額敏和卓係回部望族。應同將軍大臣等管束屯田兵丁。俟耕作嫻習。主客相安。再回吐魯番。方爲有益。昨已諭將軍成衮扎布攜眷駐烏里雅蘇台。額敏和卓若願攜眷前往伊犁。亦准其同往。至一切進勦事宜。額敏和卓頗屬實心効力。已命賞封貝勒。嗣後益加奮勉。策勲懋賞。朕將疊沛殊恩。可傳諭雅爾哈善額敏和卓知之。

（平定準噶爾方略正編）卷五十四）

乾隆二十三年五月庚寅

靖逆將軍雅爾哈善等疏奏進兵哈喇沙爾日期

上諭軍機大臣曰雅爾哈善等奏稱官兵已抵哈喇沙爾皆思奮勉効力等語覽之殊爲欣慰從前會議兩路進兵夾攻回部今兆惠等雖進剿厄魯特賊衆尚未將渠魁擒獲則辦理回部專倚雅爾哈善額敏和卓等務宜和衷商確早奏膚功至此次聲罪致討惟在波羅泥都霍集占及附和爲惡之數人與回衆無涉雅爾哈善等應宣示回衆若將首惡擒獻非但無罪且必加恩則伊等自生內變又從前議於特穆爾圖淖爾等隘口防範逆會等潛逸卽哈薩克錫喇等由此路投入回部亦可邀擒俱宜早爲布置至沙喇斯瑪呼斯賊衆大概逃入回部或哈薩克布魯特等處若謂竟自分散恐非實信雅爾哈善等亦當乘便搜捕庶逸賊盡殄臺路可清併傳諭兆惠等知之

(平定準噶爾方略正編)卷五十五

乾隆二十三年五月癸丑

靖逆將軍雅爾哈善等疏奏攻圍庫車城情形雅爾哈善等奏言臣等於五月初六日至庫車之東雅哈托和飛見有回衆遷移踪跡次日兵抵庫車哨探副都統順德訥見庫車城附近有回人三騎因諭以兩路將軍帶領大兵擒擊賊首撫恤爾等回衆伊等隨告知守城伯克遣其弟出城告言我等須候和卓木信息乞寬限五日順德訥令其投見伊等不敢前來惟問招降文書臣等因遣散秩大臣伯克托克托署守備馬英德筆帖式官住持回字文書交給卽返托克托等至城下曉諭有兩回人接取忽城中二十餘騎突出兩回人遂擒托克托馬英德官住急返亦被追擒臣等卽領兵攻城因散秩大臣伯克鄂對之言令順德訥領兵二百名先據近城樹林城中亦以百餘騎來爭見我兵卽退臣等圍城四面自未至酉城上鎗石如雨總兵閔

相師被石傷首。署前鋒侍衛常保住。署叅領觀音保及官兵人等。亦有得傷者。我兵亦殺賊甚多。次日雲梯造成。官兵從已至酉。四面攻襲。賊於城堞內。施放鳥鎗。貝勒額敏和卓。右額被傷。官兵亦有得傷者。兩日力攻未克。臣等不勝憤恨。務期盡行殲滅。此時先將賊人村落。所種麥苗。蹂踐。杏桑等果。摘食。又於卡倫擒獲回人六名。訊據供稱。庫車舊有九百戶。去年添駐回人及厄魯特等共騎兵八百餘。守城頭目名阿卜都克勒木。再去年沙喇斯瑪呼斯餘衆投降。安插於葉爾羌。喀什噶爾。小和卓木在葉爾羌。大和卓木在喀什噶爾。又於阿克蘇附近之烏斯哈雅築城。以阿卜都克勒木之弟阿卜都哈里克守之。聞大兵至。必來救援等語。臣等現飭卡倫人等。嚴行瞭望。但賊城險峻堅固。威遠礮尚不能攻。所攜四大神礮。係故明所造。年久不甚堅固。昨於哈喇沙爾試放。及此次攻城。俱已斷

裂。若領兵衝擊。徒致傷損。惟有合圍據險。伊等自生內變。至額敏和卓。年逾六旬。尚屬壯健。臣等沿途同議。伊意謂辦理霍集占等。當以計取。不可力爭。詢其如何設計。但云到彼相機酌定。今因招降不從。甚為慚愠。督兵進攻被傷。臣等以言撫慰。惟云受恩深重。必舍身力戰等語。又伯克鄂對雖係庫車頭目。其舊屬俱已被殺。及遷徙葉爾羌等處。伊但能指引路徑。不能招服回人。臣等伏思回人因額敏和卓等並非貴族。未能招服。必須大兵辦理。奏入。

上諭軍機大臣曰。據雅爾哈善奏稱。兵至庫車。攻圍二日。尚未得城等語。回衆恃城爲守。非厄魯特可比。當以計取。不可徒恃攻戰。且亦難刻期成事。雅爾哈善所奏情形。未免失之躁急。蓋畏朕責其怠玩也。將軍大臣等。領兵勦賊。其勤怠皆在朕照鑒中。不當揣摩欲速。況我兵旣四面攻圍。扼其要路。且捉生詢問。知城中儲蓄無多。此時卽未能攻克。則分兵一半。令哈寧阿圍城。誘令出戰。或乘其防

守疎懈。相機攻取。雅爾哈善帶兵一半。離城前進。聲言庫車抗拒回人。已行勦殺。不迎降而抗拒者。罪亦如之。仍蹂其禾稼。俾野無餘積。卽有援兵。必聞風逃散。且庫車回人。見我兵少。或出城徼利。斯時蹙而擊之。更易爲力。若庫車尚難攻克。雅爾哈善又當迴兵併力。一得庫車。卽可駐兵過冬。明年再辦理葉爾羌等處亦可。其相機設計之處。不知伊等曾籌及否。仍將現在情形。作速奏聞。又諭曰。朕因額敏和卓老成諳練。熟習回部情形。故命其叅贊軍務。並非欲伊身在行間。親當矢石也。今聞奮勇得傷。深爲軫念。著加恩賞賜御用荷包。仍賞銀一千兩。嗣後惟盡心協力。相機辦理。不可冒險攻戰。致有疎虞。

密諭靖逆將軍雅爾哈善等撫慰額敏和卓。

上諭軍機大臣曰。雅爾哈善等奏額敏和卓稍有觀望情形。因招降不應。奮往被傷。伊並非貴族。不爲回人所服等語。所奏非是。前命額敏和卓叅贊軍

務。不過因其熟習情形。可與雅爾哈善籌畫。非將平定回部之事。責成取必於伊也。豈有同爲大臣。而聽其舍身攻戰。不行勸阻之理。且伊既如此効力。若不加愛護。以結其心。或詞氣間轉有相輕之意。甚至別生一事。亦未可定。朕深爲厯念。可密諭雅爾哈善好爲撫慰。以示鼓勵。卽雅爾哈善等亦不得冒險欲速。致徒損官兵。於事無益。其相機辦理之處。已另降諭旨矣。

（平定準噶爾方略正編）卷五十六